

Cungjdwg Bwngaeq Nyex Ok Hux

都是鸡毛惹的祸

□ Lij Yungzcangh / 李雄章

“Gijmaz, Siujmeiz, mwngz bae daengz aen singz baihnanz he lo?” Youq ranzhenz ciep daengz aen denva lwgmbwk daeuz dwk daeuj, Aungeih fatmoengx lo——Siujmeiz cingq doeg gauhcungh ngeih nienzgaep, seizlawz deuz bae dajgoeng lune?

“Dwg ha, daxboh, gou mbouj siengj hawj mwngz caiq bae rib gij bwngaeq mbouj dij maz ngaenz, gou au bae dajgoeng, hawj mwngz gvaq ndwenngoengz ndei. Doegsaw ne, ranz raeuz miz dahnueg bae haenqrengz doeg couh ndaej lo.” Siujmeiz nai naeuz.

Ai, cungj gvaic swheij mbouj miz bonjsaeh, hix gvaic gij bwngaeq haenx——Aungeih gag ienq hwnj-daeuj.

Aungeih yah gvaqseiq ndaej caeux, Aungeih dang boh youh dang meh, haexhaex nyounnyouh, donq iek donq imq guenj song dahlwg majhung. Moix ngoenz guh sat hong ndaw reih, ma ranz lij au bae gip yakyah. Hoeng, gip yakyah hix mbouj yungzheih, gij dij ngaenz lai cungj deng vunz gip bae caez, cij lw bwn-gaeq, ndigah Aungeih cijndei ciengz bae gip bwngaeq, gai au di ngaenz cawx gyu. Saedcej couh yienghneix hamzhamz citcit gvaq dwk.

Mboujgvaq, Aungeih hix miz yiengh he hawj de ndaenggon——song dahlwg mboujdan baenzsau, lij coengmingz, cungj gaujwnj cungdenj yozyau. Dahlwg daeuz Siujmeiz doeg gauhcungh ngeih nienzgaep, dahlwg nyaeq Siujhoz doeg cuhcungh sam nienzgaep, song boux youq yozyau cingzciik cungj mbouj dwg daih’it couhwdg daihngieih.

Hoeng, seizneix Siujmeiz mbouj ndwet mbouj sing, couh caegcaeg bae

rog dajgoeng lo, neix baenzlawz hawj Aungeih mbouj siengsim ne? Ai, gangj daeuj cungj dwg gij bwngaeq nyex ok hux!

Haet haenx, dah doengzhag Siujmeiz riengz de daeuj lajmbanj liuh. Aungeih muengz bae ndaw reih swheij mbaet aen sihgva he ma ranz hawj songde gwn, songde cingq gwn dwk, byawz rox, raq rumz he baet gvaqdaej, dawz gij bwngaeq dak youq gyanghongh baet ndaej mbin rim mbwn, hawj Siujmeiz yakfaz dangq-maz, dah doengzhag de daenj gij ndangdaenj mingzbaiz nem rim bwn-gaeq, saetnaj lai lo. Siujmeiz couh hozndat raixcaix, de baez din he dik boek Aungeih aen gei au daeuj cang bwngaeq, nengh fwngz doengzhag de da hix mbouj yawj laeng couh lizbae lo. Gvaq mbouj geij ngoenz, Aungeih couh ciep ndaej aen denva Siujmeiz daj aen singz baihnanz dwk daeuj.

Bi he gvaqbae, Aungeih fwt sou ndaej 800 maenz ngaenz, dwg Siujmeiz geiq daeuj, daj youzgiz lingx ngaenz okdaej Aungeih fwngz cungj saenz. Ndaw mbanj vunz cungj haenh Aungeih miz dahlwg ndei he, rox hauqgingq bouxgeq, neix hawj Aungeih ndaenggon geij ngoenz.

Song bi le, Aungeih youh sou ndaej bit ngaenz Siujmeiz geiq daeuj he, cukcuk fanh maenz! Daj haenx hwnj, Siujmeiz geiq ngaenz dauq ranz yied daeuj yied lai, seizgan nanz le, gij vah youq raeblaeng lwnh Siujmeiz haenx cienz daengz aenrwz Aungeih: Dajgoeng ndaej baenzlai ngaenz, byawz saenz ne? Doengzyiengh dwg bae dajgoeng, bouxwnq vihmaz mbouj ndaej baenzlai, lauhei q dwg…… Aungeih roxnyinh baihlaeng deng

vunz bak coeg fwngz camx, geij boux laux hujgeiq lumj Aufueng yienzlaiz yinx daeuj caeug de gwn laeuj ganggoj haenx, menhmenh hix mbouj daeuj lo.

Miz haet ndeu, Aungeih ngamq hai dou, bau bwn gaeq he daj gwnz dou doek roengzdaej, mbinfuemfuem, mbin rim gwnz namh, nem rim Aungeih daengx ndang. De baez ngiengxgyaeuj yawj, gwnz dou lij venj miz duzgaeq dai he dem! Seizhaenx, Aungeih ndaw uk baez “um” he, fatmoengx lo, neix dwg maz saeh a?

Aungeih mbouj caiq hawj Siujmeiz geiq ngaenz ma ranz, lij mbouj siengj nyinh dahlwg neix lo!

Ndwenngoengz couh yienghneix youq vunzmbanj bak coeg fwngz camx ndawde gvaqbae. Dahlwg ngeih Siujhoz mbouj hawj daxboh vutnaj, gaujwnj baihbaek aen cungdenj dayoz he, caemhcaiq ndaw yienh lij ciengj hawj de fanh maenz ngaenz dem. Ngoenzhaenx, fwngz bungj mbaw dan dayoz souaeu dunghcih haenx, Aungeih raemxda laeobegboeg. Seizhaenx, Aungeih caen siengj heuh gyoengq hujgeiq daeuj ranz gwn song cenj laeuj, hoeng, aenvih Siujmeiz, lij miz bouxlawz daeuj riengz de gwn laeuj dem ne?

Cij miz swheij gag ndoet lo, haemhhaenx, Aungeih fiz lo……

Ngoenz daihngieih, Aungeih singj gvaqdaej, Siujhoz lwnh daxboh naeuz: “Ceimeiz yak dauq ranz lo.”

“Gaej youq dangnaj gou dwen de, de gamj ma ranz gou couh dub ga de raek bae!” Aungeih rongx naeuz.

“Daxboh, mwngz loengngeiz dahcej lo, gizaed de mbouj lumj caezgya siengj nei, dahcej dwg riengz vunz hag gisuz, dang ndaw cangj

gisuzyenz cij canh ndaej baenzlai ngaenz. Dangh mwngz mbouj saenz? Baezneix de riengz daegyox de ma mbanj banh aen denswjcangj he bw. Yienghneix gyoengqvunz mbanjranz raeuz couh mbouj yungh okdou hix ndaej guh hong canh ngaenz lai, mbouj caiq hoj ndaej bae gip bwn-gaeq lo.”

“Mwngz gangj caen gangj gyaj?” Aungeih buenq saenz buenq ngeiz.

“Dangyienz caen lo.” Siujhoz angq dap.

Siujmeiz ma ranz lo, lij daiq daegmbauq he riengz dauq dem. Gvaq le song ndwen, aen denswjcangj couh haicieng lo. Ngoenzhaenx, vunz ndaw mbanj geq iq cungj daeuj gwn laeuj, Aufueng boux hujgeiq Aungeih hix daeuj lo. Siujmeiz ndenq ien hawj Aufueng, daegyox Siujmeiz diemj ien. Aufueng doq cup doq najmong dwk doiq Siujmeiz naeuz: “Siujmeiz ha, gaxgonq cungj gvaic au mwngz vunz geq da mbouj rae, loengngeiz mwngz lo……”

“Gvaic maz ne, au, neix dwg au mwngz cehda nyaenx mbouj ndaej namhsa, muengh gou byaij loh cingq.”

“Dwg ha, dwg ha.” Aufueng danq naeuz.

Gyoengq ranzhenz hix daeuj lo, Aungeih muengz bae roengq gaeq gaeb gaeq, geij boux hauxseng muengz bae bang fwngz.

Gyoengq hauxseng dinfwngz vaiq, yaep he gaeq couh miq hau lo. Yawj gij bwngaeq gwnz namh, Aungeih da youh mbaeq lo.

Haemhhaenx, caeug gyoengq hujgeiq gwn laeuj caimax, Aungeih fwngz yaengx din hwnj, daengz sat gwn ndaej engq fiz lo……




□ Hausij

Bouxvunz coengmingz ndeu bae baiq sien, gouz bouxsien baujyouh aen mbanj de it bi 365 ngoenz bouxboux ndang cangq mbouj baenzbingh. Bouxsien naeuz: “Mwngz yauhgiuz baenzlai, cei q lai ndaej 4 ngoenz, mwngz gag senj ba!” Bouxvunz coengmingz naeuz: “Yienghneix gou couh senj ngoenz seizcin, ngoenz seizzah, ngoenz seizcou caeug ngoenz seizdoeng.”

Bouxsien naeuz: “Baezneix mbouj suenq, cei q lai ndaej 3 ngoenz, mwngz senj 3 ngoenz lawz?” Bouxvunz coengmingz naeuz: “Yienghneix gou senj ngoenzlwenz, ngoenzneix caeug ngoenz-cog.”

Bouxsien youh naeuz: “Baezneix hix mbouj suenq, cei q lai ndaej 2 ngoenz, mwngz senj ba!” Bouxvunz coengmingz naeuz: “Yienghneix gou senj ngoenzrongh caeug ngoenzhaemh neix.”

Bouxsien ienq naeuz: “Baezneix hix mbouj suenq, cei q lai ndaej ngoenz ndeu, mwngz vaiq senj!” Bouxvunz coengmingz naeuz: “Bouxsien mwngz byonj bae byonj dauq, baezneix gou senj liux, mwngz itdingh au doengzeiq.” Bouxsien mbouj miz banhfap, cijndei ngaekgyaeuj. Doeklaeng bouxvunz coengmingz senj moix it ngoenz. Bouxsien cijndei dapwngq lo.



Bouxdkbya caub ruz youq aen buz gvangqlangh caembcaiq beuyau.